

欽定大清會典事例

欽定大清會典事例卷五百七十

兵部

職制 調補 降調補用

調補。○原定福建省臺灣總兵官。三年俸滿。由部將該省現任總兵官。開列具題。請

旨調補。臺灣協澎湖協北路協各副將遊擊都司守備。臺灣城守營南路營各參將守備。臺灣鎮標中左右三營遊擊守備。北路淡水營南路下淡水營各都司。江西省廣信營饒州營各參將。鉛山營浮梁營武寧營永新營各都司。廣東省崖

州營參將守備。廣西省新太協副將都司守備。
融懷營參將守備。右江鎮標中左右三營陸林
營恩思營各遊擊守備。鎮安協慶遠協各都司
守備。上林營龍憑營旭森營三里營上思營各
都司。東蘭營守備。雲南省昭通鎮標中左右前
四營遊擊守備。鎮雄東川廣南元江各營參將
守備。以上各官遇有員缺。該督撫揀選諳練老
成熟習風土之人。題請調補。○又定福建省臺
灣澎湖副將在任三年。參遊都司在任二年。千
把在任三年。均屆期調補。○雍正二年議准。廣

東省陸路各官內。有情願效力水師者。於每年
出洋巡哨時。隨同演習。果能熟習水務。能發縱
指使者。以水師員缺。或升或調。酌量題請。○七
年奉

旨。凡遠省煙瘴地方。文武官員缺。例將本省熟習風土
之人調補。朕思煙瘴地方。大半係邊遠簡僻。若概行
調補。不令升補。未免強幹之員。轉駐簡僻之所。止圖
挨俸。無所表見。而才具可用。有志上進者。或生苟且
因循之習。亦未可定。嗣後凡遇煙瘴地方。文武官員
缺。向例調補者。著該督撫提鎮等。於屬官內。秉公酌

量。若有可以題升之人。即具題請旨升授。若係應調之人。仍照舊調補。升調兼行。不拘一格。總期人地相宜。材職相當。以副朕鼓舞裁成之至意。儻有應行調補之人。不願前往。而該管上司。聽其規避。或有不應題升之人。而該管上司。徇情題升。經朕查出。定行從重議處。○八年議准。福建省臺灣水師營遊擊守備。廣東省崖州水師營參將守備。俸滿之日。該督提查覈具題。調回內地。俟本省水師員缺。題請調補。○乾隆四年奉

旨。廣西右江。水土惡劣地方。其駐紮參守等官。皆准分

別年限報滿候升。而總兵官以係特簡大員。不准移調。於情理未協。應令該督撫悉心斟酌。或量移善地駐紮。如不便移駐。亦當於通省總兵官內。限年移調。著定議具奏。欽此。遵

旨議定。廣西右江鎮總兵官。三年俸滿。該督提題報到。日。由部將左江鎮。並附近右江鎮之貴州安義鎮。廣東右翼高州各鎮總兵官職名。開列具題。

恭候

欽點一人調補。其所遺員缺。即將右江鎮總兵官補授。○七年奉

旨。朕從前因右江總兵官員缺。地處邊瘴。水土惡劣。是以降旨令三年調換。今二年之內。連故二鎮。朕心深為軫惻。覽本內開列之人。恐亦未必熟習右江風土。或於附近總兵副將內。熟習風土者。揀選升調一人。或將右江總兵官。改為副將。並酌量移駐。與現在駐紮地方。相離稍遠。以免瘴癘。著該部詳議具奏。欽此。遵

旨議定。右江鎮員缺。雖將附近右江之貴州安義鎮。廣東右翼高州鎮。同左江總兵官。開列請

旨調補。恐未必熟習風土。嗣後應令該督提於本省副

將內。擇其熟習右江風土者。揀選題升。如本省副將不得其人。於廣東通省副將內。一併揀選。如仍無可題之人。該督提豫將兩省副將。無可題補緣由報部。即比照吏部廣東瓊州府屬煙瘴地方。用附近雲貴等省人員之例。將各省現任副將內。籍隸兩廣湖南雲南貴州等五省人員。開列具題。恭候

欽點補授。俟俸滿之日。即行報部調回內地。遇有各省總兵官員缺。由部具題。請

旨補授。○八年議准。湖廣省苗疆之沅州辰州施南

永綏永順寶慶靖州等七協副將。臨武宜章桂陽三營參將。遇有員缺。該督提於通省副將參將內揀選調補。○十年議准湖廣省永綏靖州二協副將。桂陽營參將。皆係最要苗疆。如遇員缺。該督提先儘內地合例副將參將揀選調補。如內地實無可調之人。於疏內聲明。由部將豫保人員掣補。其沅州辰州寶慶施南永順五協副將。宜章臨武二營參將。皆係次要苗疆。如遇員缺。該督提於內地揀選副將參將調補。僅一時不得人地相宜。由部以卓薦一等記名之人。

開列請

旨補授。○又議准。福建省臺灣水師陸路各外委員。缺。均就臺兵考拔。三年報滿。與內地外委互相調補。○十八年奉

旨。右江總兵一官。地處邊瘴。水土惡劣。必得與該處服習者。始可題補。若所保人員內。有遇降革事故。該部即按例議駁。恐一時難得相宜合例之人。而總兵大員。膺封疆重寄。今止由該督提揀選請旨補授。亦非慎重簡畀之意。嗣後右江總兵官。將屆俸滿。著該督即於本省副將內。豫行揀選。不必拘以有無事故。但

擇其人地相宜。堪勝總兵官之任者。擬定正陪。送部引見。候朕簡用。○二十三年題准。江西省南昌鎮標後營守備。改為揀選調缺。○二十六年議准。山西省歸化城守營都司員缺。該撫於滿洲人員內揀選題調。○二十七年議准。福建省臺灣參將遊擊都司守備等官。歷俸三年屆滿。於五月以前。先行遊員調補。仍扣足三年。再行報滿。○二十九年議准。甘肅省撫標中軍參將。原係調缺。今改為督標中軍副將。定為題缺。○又議准。各省題請調補調署官員。除降革留任。例有展

叅及督催分數錢糧。承追虧空贓罰。不准調補調署外。其承追督催不作分數之雜項錢糧。及降俸住俸罰俸緝拏之案。仍准調補調署。如降革留任。並無展叅。亦准一體揀選調補調署。將降革之案。帶於新任。接算年限開復。至於奉旨題補之缺。亦不論何項叅罰。悉准揀選調補。此等對品調補官員。俱毋庸送部引。

見○三十年奏准。雲南省普洱鎮總兵。地處煙瘴。三年俸滿。調回內地。所遺員缺。令該總督於雲貴兩省副將內。擇其熟悉風土邊情之員。擬定正

陪送部引

見恭候

欽簡。○三十一年題准。湖南省撫標中軍參將缺出。該撫於現任參將內揀員調補。○三十八年奏准。直隸省督標中軍副將保定城守營參將均作為在外調補之缺。遇有缺出。先儘該省推缺副將參將內揀選調補。遺缺仍歸部推。如無可調之員。即行咨部。副將照例開列請

旨簡放。參將歸入月分推補。○又覆准。雲南省裁景蒙營守備。改設普安營都司。裁元江營右軍守

備。改為普安中軍守備。俱定為題調之缺。○三十九年奏准。廣西省提標中軍參將。定為調缺。○又奏准。山西省豐川營守備員缺。該撫於通省滿洲人員內。揀選題調。○又奏准。廣西省鎮安協副將員缺。定為在外題調。○四十一年題准。甘肅省瑪納斯協副將。並左右二營都司守備。該處如無可題之員。即由總督於內地揀員題調。○四十二年議准。雲南省普安營都司一缺。裁汰。守備撤回。景蒙營員缺。改為部推。○四十二年議准。四川省新設成都將軍標中軍副

將左營都司右營守備各員缺。該總督會同將軍將熟悉邊地夷情及屯防事宜之員。揀選題調。○又奏准四川省嘉順營都司。瀘寧營守備。原係題缺。改為調缺。○又奏准山東省壽張營遊擊守備員缺。於通省簡缺遊擊守備內。揀選調補。遺缺仍歸部推。如簡缺無可調之員。奏請簡放。○四十四年奏准湖南省臨武營參將員缺。原係題調。改為部推。○又奏准四川省撫邊營慶寧營各守備。均定為題調缺。○又奏准伊犁鎮標中左二營各遊擊守備右營都司守備霍爾

果斯營參將守備巴燕岱營都司塔爾奇營守
備各員缺。由伊犁總兵揀選。呈送將軍考驗。會
同總督保題補放。如伊犁並無合例之員。即咨
會總督。於就近內地各標營內。揀選諳練邊疆
之員。題請調補。○四十六年覆准伊犁總兵五
年俸滿時。兵部將陝甘二省總兵官。開列職名。
請

旨調補。○又題准廣東省廣州協左右營守備。連陽
營遊擊。均定為在外題調之缺。○四十七年議
准四川省懋功協副將都司。綏靖崇化各營遊

擊守備員缺。該總督會同將軍揀選題調。○四

十八年

諭嗣後臺灣總兵道府各員。俱著改為五年任滿。屆期若一體更換。未免俱易生手。著將總兵道府輪開更換。每遇兩年。更調一員。○五十三年議准。福建省臺灣北路左營守備。駐紮嘉義縣城。為全郡適中之地。應另設都司一員。作為調缺。遇有缺出。於內地現任都司內。揀選調補。其原設守備。即移紮斗六門。仍作為題調之缺。○五十六年

諭臺灣副將一缺。關係緊要。必得諳習風土熟悉情形

之員。方與營伍有益。嗣後所有俸滿更調之例。著停止。欽此。遵

旨議定。福建臺灣副將參將遊擊都司守備。向例三年俸滿。調回內地之例。概行停止。均准在臺升轉。其千把外委。仍照舊例辦理。○五十七年奏准。湖南省之鎮。鎮州鎮。長州鎮。沅州鎮。靖州鎮。協。永綏協。永順協。宜章營。桂陽營。武岡營。長安營。綏寧營。保靖營。湖北省之施南協。衛昌營。各副將參將遊擊都司守備。共四十七缺。定為在外題調之缺。俱照常俸升轉。其向例五年俸滿。

分別保送調回之處。概行停止。並令該督查照原定各缺。分別題補調補。以杜牽混。其寶慶協九路營副將都司遊擊守備四缺。均改為部選之缺。至荊州水師營守備一缺。向來該督每以地方緊要。在外遴補。應改為調缺。○又題准。湖南省寶慶協副將。原係調缺。改為部推。○五十八年。奏准。山東省濟南城守營守備員缺。定為在外揀員調補。○嘉慶二年。奏准。湖南省辰州協副將。移紮乾州。改為在外題補之缺。○五年。奏准。各省陸路將備。有清願改補水師者。詳明

督撫發交出洋試驗。除試驗未嫻者。即撥回陸路。照蒙混呈改之例。辦理外。如果能通曉水性。取具試驗官員印結。題明改調。由部註冊。遇有應補缺出。將改補人員。與現任水師應升人員。相間輪用。其業經題改後。僅有不諳水師者。將冒昧出結之原驗官。及率行題改之督撫。分別議處。○又

諭。水師之用。原與陸路迥殊。必得熟習水性。方克履險如夷。若將水師得力之員。調赴陸路。不特舍其所長。用其所短。而洋面驟易生手。於巡防無益。關係甚重。

著各該督撫提鎮等。於所屬武弁內詳加體察。若果能通曉水師者。不得輕調陸路。使專心練習。而朕擢用提鎮大員。亦覈其本係水師陸路分別簡放。庶收因材器使之效。○又議准。江西省南昌鎮標後營守備。改為九江鎮標後營守備。仍令在外題調。○六年奏准。在部候補人員。有呈明生長海濱。願改水師者。將該員帶領引

見請

旨發交該督撫試驗。以到標之日起。扣滿三年。酌量補用。如非生長海濱。及請以內河水師改用者。

俱不准其呈改。○又奏准新設湖北省提標中軍參將。鄖陽鎮標中軍遊擊。均定為在外題調之缺。○七年奏准新設四川省太平協副將。定為在外題調之缺。○十年

諭。籍隸江浙閩廣等省之陸路人員內。有素習水性願改舟師者。准其呈改。○十三年奏准山東省候補候選人員內。有生長海濱。熟悉水性。願改外海水師者。准其一律呈改。○十四年議准四川省太平協副將改駐綏定。作為綏定協副將。仍定為題調之缺。○又議准湖南省新設鳳凰廳屯守

備三員。乾州古丈坪保靖三廳縣屯守備一員。永綏廳屯守備二員。定為題調之缺。遇有員缺。該督於熟悉屯務諳練苗情之員。揀選題請升調。○又議准。直隸省新設大沽營都司。海口營守備。均定為題調之缺。○十六年議准。福建省臺灣新設瑤瑒蘭守備一缺。如臺地無可升之員。於內地各員內擇其曾任臺灣熟悉風土者。題請調補。○又議准。直隸省新設建昌營赤峯營各都司。朝陽營守備。八溝營參將守備。俱定為在外題調之缺。遇有缺出。建昌赤峯朝陽各

都司守備。於沿邊滿員內升調。八溝營參將。於通省滿員內升調。八溝營守備。於滿漢各員內升調。由該督酌量揀選題調。○二十年議准。雲南省騰越鎮總兵。改為在外調補。於雲貴兩省總兵揀選二員。奏請

簡調。遺缺仍請

旨簡放。○道光三年

諭。山西平陽營守備。並非海疆邊要之缺。自應照例歸部銓選。該撫邱樹棠請以太原鎮標守備向思璜調補。殊與定例不符。所奏著不准行。○咸豐六年議准。

臺灣武職缺出。如臺地無員可升。內地亦無員可調。准於內地揀員題請升補。歷俸五年期滿。保題送部引。

見升用。○光緒三年奏准。嗣後無軍務省分。各督撫奏調隔省實任人員差委。於奉

旨允准後。即將底缺開除。留於奏調省分。由該督撫遇缺儘先請補。不入輪缺計算。其實缺人員。曾經續保升階。及本條借補。暨奏調各項候補人員。並將原省開除。均以奏調奉

旨之日。歸新調省分。各歸升階本班。挨次序補。至軍

營奏調實任人員差委。應俟凱撤回任。毋庸開缺。○四年奏准。嗣後各省調缺。該督撫奏補時。應照定例於現任應調應升人員內調補升補。其保舉儘先及各項候補人員。概不准借補請補。○七年奏准。嗣後各督撫奏調隔省實缺人員留防營差委。於奉

旨允准後。即將底缺開除。各歸各本省請補。並由兵部分別擬補選補。概不准援引軍營出缺之例。率以防營人員請補。如有援引奉

旨允准者。仍由兵部查明請

旨更正。○又議准四川省新疆所屬懋功屯臺糧務。揀派現任或試用人員管理。扣滿三年撤回內地。因係煙瘴地方。酌減一年。如經理無誤。題報以應升之缺註冊。儻有虧短錢糧等事。即行嚴叅。○十三年

諭。楊岐珍係實缺人員。現經留辦臺防。四川又無軍務。該督所請調赴川省差委之處。著不准行。實缺提鎮武職大員。體制較崇。近來狃於積習。各督撫因其曾膺保薦。往往奏調差委。視同部曲。而該提鎮亦遂甘聽指麾。僅顧私恩。罔知大體。既失朝廷

建立專閫之意。又開黃緣依附之門。此風斷不可長。嗣後各督撫於實缺提鎮。概不准率行奏調。以符定制。

降調補用。○順治年閒定。提督降一級。不補總兵官。降銜一等。借補副將。如降二級及總兵官降一級。皆以副將用。若降級多者。依次以參將等官補用。副將降一級。補參將。參將降一級。補遊擊。遊擊降一級。補都司。都司降一級。補守備。守備降一級。補守禦所千總。守禦所千總降一級。補衛千總。衛千總降一級。補營千總。營千總

與門千總降一級補把總。把總無級可降革職。以上應補副將者。俟人文到部之後。遇有員缺與應升之人。一同開列。參將以下。衛千總以上。挨班補用。應補營千總把總者。到部後分發各該員原籍附近省分。交該督撫提鎮與該省應行考拔之千總把總。一例考驗拔補。門千總降一級應補把總者。分發巡捕營以把總拔補。○康熙三十七年議准。巡捕營各官降級調用者。照所降之級。仍以巡捕營用。○雍正十三年議准。降級調用武職各官。如有奉

特旨從寬免其降調。仍以原官補用者。准以原官補用。餘按所降之級降補。○乾隆十七年奏准。外海水師降補人員。因並無部推之缺。該員等到部後。皆奏請引

見。或發往該員本省。或發往鄰省。有外海水師之題缺者。交與該督等。以該員應用之缺。酌量題補。至內河水師降補人員。一經赴部。參將遊擊。尚有部推之缺。可以銓補。惟守備一項。部推雖有八缺。先經奏准。第一缺用水師藍翎侍衛。第二缺用造冊送部選用之水師年滿千總。再有缺

出。均照此輪用在案。是降調赴部應補內河水師守備。無班可歸。嗣後內河水師守備。照外海水師之例。遇有降調守備者。由部引

見請

旨發往有內河水師守備題缺之江南廣東二省。交與該督等。與應補人員。一例酌量題補。又內河水師部推都司止有四缺。亦經奏准補用水師藍翎侍衛。如有降補都司之人。亦無班可歸。查內河水師都司題缺。江南四缺。浙江一缺。遇有降補都司赴部者。並照守備一例辦理。○二十

九年定提督降一級。補總兵官。俟人文到部之日。遇有員缺。與應升人員。一同開列。至于總降二級。把總降調在三級以內。由部行文該督撫。查明該員平日居官好者。改為革職留任。○又

諭。向來降調官員。例應引見者。俱由該督撫出具考語。送部引見。其離任候補之員。因係前任內案件註誤降調。本籍督撫。向以並非現屬之員。無從出具考語。嗣後離任人員。緣事降調。應行引見者。並著原任督撫一併出具考語。送部引見。著為令。○又

諭。前經降旨各省離任候補之員。有因前任案件註誤

降調者。令原任之督撫。出具考語。送部引見。但此等人員。離任事故不同。多有遲至二三年及數年後始行請咨赴部。其原任上司早已更易。代任者又未悉其賢否。何從懸擬考覈。嗣後著於該員等甫經請咨回籍時。該督撫將該員居官如何。出具切實考語。即行咨明本籍督撫存案。俟例應引見時。徑由本籍督撫查明原咨考語。敘入文內送部。毋庸再赴原任上司衙門請咨註考。以歸畫一。著為令。○又奏准。外海水師降調人員。留於該省補用。毋庸赴部分發。

○三十六年奏准。嗣後應降營衛官員。即於降

調本內查明。該員由營缺降調者。即以營缺遞降。由衛缺降調者。即以衛缺遞降。不得以衛缺補用較難。改補營缺。○三十九年定。營守備降一級。以營千總補用。至綠營旗員降補。應用千總把總者。飭令回旗。以旗員對品補用。○四十年奏准。旗員補用提督總兵。緣事降調。其應降品級。由部聲明。帶領引

見。令其在何處當差之處。恭候

欽定。其副將以下等官。緣事降調。亦按所降之級。聲

明引

見。仍以綠營用者。歸部照例銓用。以旗員用者。應降參將遊擊。以四品旗員用。都司以五品旗員用。守備以六品旗員用。降至千總把總人員。令其在旗當差。如年老衰弱者休致。○五十年奏准。降調應用千把人員。毋庸送部。俱令該員各就本籍省分。由該督撫考驗。報部候補。如年力衰老。弓馬生疏者。即勒令休致。○五十八年奏准。升署未經實授官員。遇有降調處分。仍按其原任職銜降調。○五十九年

諭。武職承緝盜案。限滿無獲。例應降調之把總。因其無

級可降。例得詢問居官。該督撫若查其平日居官尚好者。仍准其留任。是此等微末人員。徒有降調之名。無懲戒之實。總由該督撫等意存姑息。不能嚴行察覈。率請留任。以致該員弁等無所顧畏。嗣後文武各員內。職分較小。無級可降者。遇有降調處分。除居官平常者。照例斥革。其經該督撫等。察其居官尚屬可用。把總即以經制外委補用。不准食餉。○嘉慶十二年議准。武職官員緣事降調。遵

旨送部引

見之未經開缺各官引

見時。如奉

旨仍發往本省以原官補用者。即行開缺。將該員發
往該省候補。

欽定大清會典事例卷五百七十一

兵部

職制

引
病痊起用

見
升銜留任

武職養親

引

見○順治年間定。巡捕營參將遊擊守備及門千總
推升外任時。引

見請

旨補授。○康熙六十一年議准。在部投供候選副將
以下。門衛千總以上。得缺後引

見請

旨補授。其現任論俸推升參將以下。守備以上。均停其引。

見由部具題奉

旨後將劄票封發該督撫提鎮詳加驗看。如有年老有疾人材不及者。即題明勒令休致。部中別行推補。如將年老有疾人材不及者。給發劄票。令其赴任。不能供職。將該督撫提鎮照徇庇例議處。○雍正十一年奉

旨。嗣後雲貴兩廣福建四川參將以上人員。除未經引見外。若有引見已過三年。應令赴京者。著該督撫先

行請旨。不必即令起程。○乾隆二十二年奏准。凡題請升補。以及月選各官。例應引

見者。向例俟部覆到日。該督撫給咨送部。但此等人員。有因公來京。適遇該員題推升補。若必俟差竣之日。回任請咨赴部。不特往返紆迴。抑且員缺久懸。嗣後例應引

見人員。適遇因公到京。准令該員於差竣之日。呈明行文該管衙門。查明並無未清事件。兵部帶領引

見恭候

欽定。○三十一年

諭。嗣後凡調取引見人員內。有現經丁憂者。該部查明扣除。俟該員服闋後補行引見。如有特旨不拘事故。即令引見者。不在此例。著為令。○三十二年議准。一切應行送部之題補豫保卓異推升各員。該督撫於接准部覆之日。限四箇月給咨送部。兼管二省之總督。所管隔省人員。限六箇月給咨送部。如逾限不行送部。即將該督撫照遲延例議處。其有承辦要差。不能依限赴部者。先行聲明咨部。俟差竣再行送部。○又奏准。推升參將遊

擊都司等官。照題補之例。叢明引

見已過三年者。給咨送部引

見。給予劄付。○三十四年奏准。各省送到之年滿千

總。適遇

啟鑒之期。始到京投文者。不無觀望遷延。希圖驗放
情弊。嗣後此等人員。給咨赴部時。如有遲延規
避等情。即行叅處。○三十五年

諭。李侍堯奏。推升都司高天琪。於上年七月暴發眼疾。
迄今醫治未痊。已成殘廢。不便給咨引見。請令休致。
一摺。所奏非是。高天琪於上年七月內推升。即應飭

令赴部引見。武職交代。有何要務。直待半年之久。始赴省謁見該督。其因病遷延。已可概見。且該員目疾已久。營務必致廢弛。今因給咨引見。慮難逃朕洞鑑。該督始將該員勒令休致。貌似據實覈辦。而隱掩其平日姑容之迹。封疆大臣。豈宜若此。李侍堯著交部察議。嗣後各督撫於所屬文武各員。若平日不加查劾。直俟推升引見時。始行陳奏者。俱照此行。○三十

六年

諭。嗣後如朕巡幸時。遇有豫保千總咨送到部。即著留京辦事之王大臣。照外省送到年滿千總之例驗看。

分別註冊。令其回任。毋庸在京守候。○三十八年

諭。嗣後論俸。推升武職人員。於給咨送部時。著各督撫
出具切實考語咨部。兵部於帶領引見時。註明綠頭
籤上。候朕臨時酌量錄用。著為令。○四十二年

諭。武職滿員副將以下。丁憂俸滿患病等事。回京改用
京職者。著兵部於每年年終帶領引見一次。候朕酌
量記名簡用外任。其不記名者。下次毋庸再行引見。

○又

諭。嗣後漕船抵通。糧石交完後。所有應行送部之運員。
該倉場侍郎即行給咨送部。該部亦即循例帶領引

見著為令。○五十四年奏准。部推副將缺出。由部開列請

旨補放人員。曾經保舉引

見。及交軍機處記名者。均毋庸調取引

見。其餘俸深功加。及本省人員內補放者。俱照參將

以下之例。查明引

見。已滿三年者。調取引

見。○五十五年

諭。嗣後伊犁烏魯木齊補放守備以下微員。俱毋庸來京引見。○嘉慶七年奏准。豫保題明註冊人員。掣補

時。如距前次引

見已逾三年。俱調取赴部。○道光六年奏准。現任武職。應坐補原缺人員。如捐升別項。與捐免坐補原缺。遇升補之日。俱令赴部引

見。○十四年

諭。琦善奏請將俸滿各將領備弁暫緩引見等語。直隸省近接京畿武備攸關緊要。現屆冬令。宮內非閱箭之時。著照該督所請。將俸滿各武職。緩俟春融再行送部帶領引見。至部中推升。例有定限。各員弁一律辦理之處。著兵部妥議章程具奏。欽此。遵

旨議定。嗣後直隸省題升俸滿推升應送部各員。該督於春夏秋三季。覈計程途。酌量給咨送部。惟河營責在修防。三汛盛漲之際。勢難離工。待至冬季。方能稍暇。其引

見人員。應仍照舊例辦理。山東。山西。河南。俱照直隸辦理。其餘各省道路較遠。應送各員。隨時陸續給咨。毋得積至冬季始行送部。○十七年

諭。昨日兵部將甘肅題補副將共保列一等之魯福山帶領引見。該員箭射無準。惟係鄉勇出身。究非營弁久於練習者可比。魯福山著准其一等補授甘肅莊

浪協副將。仍罰俸六箇月。瑚松額著加恩免其議處。

○二十一年奉

旨。嗣後鎮將等到京。即令自行遞牌遞片。毋庸另奏。○

二十二年

諭。嗣後水師將備各官赴部時。著無須閱看馬箭。如果練習水務。精熟槍礮。遇升補時。令該督撫出具切實考語。將例應引見各員。分作四季給咨。分限二五八十一等月。按期赴部。該部即定於二五八十一等月二十八日考驗。先期奏請欽派御前侍衛乾清門侍衛一二員。會同該部堂官閱看槍礮。其演槍步數。著

定為四十弓。演礮以二出為度。均於城外酌擇寬闊地面演試。如不能合式。即將該員退回本任。勒限演習。並將原保督撫提鎮分別議處。其中槍合式者。准其帶領引見。以示勸懲。惟水師駕舟出洋施放槍礮。與陸路情形不同。全在帶領巡哨各員。平日加意講求。庶使該員弁等技藝精純。能於洋面施放有準。著江蘇浙江福建廣東山東各督撫提鎮。嚴飭所屬。勤加訓練。於考拔弁兵題升將備時。即以此為去取。庶幾有志向上之員。認真演習。日就純熟。不至視為具文。○二十五年奏准。嗣後外海水師人員赴部引

見應照章演放槍礮。各督撫給咨。應聲明熟習槍礮考語。儻漏未聲敘。即將該督撫咨吏部議處。該員咨回本任。○三十年

諭。本日召見安徽蕪采營遊擊薩齡阿。朕觀其人雖粗率。詢之於營伍事務。尚屬去得。惟伊謝恩時並未奏清語。追問及眼前清語。亦茫然不知。且奏稱自幼並未學習。殊堪詫異。我朝根本以清語騎射為首務。薩齡阿實屬旗人中之敗類。伊本由健銳營出身。著仍回健銳營當差。賞給四品頂戴。令伊專心學習清語騎射。毋仍蹈外省惡習。著載銓等留心察看。如果自

知奮勉。俟有何項章京缺出。酌量補用。○咸豐八年
諭。兵部奏例應引見之都司。不能射箭。請旨遵辦一摺。
儘先都司陸得勝。既據官文咨明兵部。因在湖北打
仗。槍傷膀臂。難以挽強運重。該部驗看屬實。陸得勝
著於帶領引見時。免其射箭。嗣後送部引見武職員
弁。遇有因傷不能射箭者。即由各該督撫奏明辦理。
○同治三年奏准。嗣後武職升補人員。如實在
軍營。准給署劄。非軍營人員。或有承辦要件不
能依限赴部者。該督撫奏明展限。事竣趕緊給
咨赴部。毋庸先給署劄。仍不得屢請加展。其由

部擬補人員照例調取引

見○五年

諭。向來各省提鎮等官。凡經簡放實缺者。皆應陳請來京。陛見。近因軍興以來。各省實缺提鎮。或在軍營帶隊。效力前驅。或因本省辦防。堵勒喫緊。故於該員奏請陛見時。每令其毋庸來京。原以重軍事而專責成。期於早殄逆氛。不致因入都往返之煩。致勦賊或延時日。然近來由軍營保舉。游升提鎮各員。往往有簡放實缺多年。而從未經陛見。甚且習以為常。竟有不復陳請入覲者。提鎮係專閫大員。為通省各營表率。

其操防之能否。方略之短長。朝廷尚未周知。何以備干城而明黜陟。嗣後軍務稍鬆。及無軍務各省。所有實缺提督總兵大員。均著奏請來京陛見。候旨遵行。至各路軍營打仗出力。由兵勇保至記名提鎮者。如現未在營帶隊。及業經凱撤回籍各員。並著各路原保統兵大臣督撫。出具切實考語。分起送部引見。其副將以下等官。由該部照例辦理。以副朝廷慎重營伍至意。○又

諭。兵部奏記名提鎮無標營可歸各員。請發往各省各營差委一摺。所見甚是。各省武職積功保至提督總

兵。其中不乏才能出色之員。近因記名人員較多。一時未能補缺。其有在各省各營差委者。尚可藉資練習。至無標營可歸各員。赴部引見後。守候日久。投閒置散。必致枝藝荒疏。殊為可惜。著兵部查明業經引見之提督總兵內。無標營可歸各員。開單呈覽。候旨發往各省標營差委。其尚未到部各員。並著俟將來帶領引見時。聲明請旨。○八年奏准。嗣後副參兩項。未經保留省分。或由原保。或原籍之督撫大臣。出具切實考語。陸續送部。隨時帶領引見。開有題缺省分。請

旨發往。不必積至五員。以示體恤。其保有省分者。因
差來京齎咨到部帶領引

見後。仍發往原省候補。○又奏准。軍興以來。保舉過
多。逐一調取。恐致紛擾。嗣後保有省分之副參
兩項。經督撫給咨送部。無論是否因差來京。一
律帶領引

見其未經引

見人員。准其俟補缺時。再行送部。○光緒三年奏准。
嗣後改用水師。及邊俸俸滿人員到部。即據咨
揭。隨時帶領引

見。毋庸令本員在京守候保題奉

旨。再行帶領。○九年覆准。嗣後打仗受傷武職員弁。必須手足受有重傷。方准請免騎射。儻有捏飾情弊。一經發覺。即將本官及驗看出結之員。代為奏請之督撫大臣。照告病不實例。分別議處。所有從前准免騎射。並此後請免騎射各員。弁一律改練槍礮。凡遇軍政閱伍。及一切操練。亦均考驗槍礮。儻演習不精。即照弓馬生疏例。奏參懲處。其送部引

見者。應照水師章程。按二五八十一等月二十八日

考驗之期。先期給咨赴部。由

欽派大臣會同考驗槍礮。如不能合式。即將該員咨回本省。勒限演習。並將保送之督撫提鎮議處。其合式者。分別帶領引

見驗放。於排單及綠頭籤內。詳細聲明。恭候

欽定。○十三年

諭。向來漢軍人員引見。應口奏清語履歷。乃本日兵部引見之千總徐元璞。范一倫。履歷竟奏漢語。殊屬非是。漢軍世隸旗籍。國語理宜熟諳。嗣後引見人員。務當遵照向例。口奏清語履歷。毋得稍有違

誤。致干重處。

升銜留任。○順治初年定武職記名各官。已經
選升別任者。其原任除係水師營緊要者。許該
督撫提鎮題請以升銜留任外。其餘一概不在。
○乾隆二年議准。陝西。甘肅。四川。廣西。雲南。貴
州。六省武職各官。俸滿推升他省者。如升銜留
任之員。實能稱職。該督撫等查明。遇有員缺。無
論應選應題。准其照升銜題補。若推升他省。因
與人地相宜。不便即令升去。經該督撫等題留
者。其員缺或經補用有人。該員遇有本省題缺。

准其題補。○十年議准陝西甘肅四川廣西雲南貴州六省各官推升他省。經該督撫題留者。其原缺別經補用有人。留於該省候缺者。遇有該省應題之缺。停其將豫保之人掣補。即將題留各官。按照相當之缺。指名請

旨補授。○十三年

諭。向來河工武職。原不諳營伍。該部論俸推升他處。既於營務無益。而河工轉少一熟練之人。是以該總河每每奏請留任。該部亦必議准。似此一升一留。習為故套。員缺又復久懸。殊非體制。嗣後此等河工武職。

遇推升時。作何留工。升用之處。該部定議具奏。欽此。
遵

旨議定。江南河營參將一員。遊擊二員。守備二十員。河
東河營守備三員。直隸河營守備一員。本營大
缺無多。直隸河南山東各營。又無大缺可補。嗣
後參將如小銜者。推升時加銜一等留任。直加
至參將銜。仍留原任。於開列副將本內聲明。遊
擊如小銜者。推升時加銜一等留任。直加至遊
擊銜。仍留原任。有參將缺題補。如無參將缺。論
俸推升。仍加銜留任。小銜守備。如應升時。加銜

一等留任。直加至署都司銜。仍留原任。有遊擊缺題補。如無遊擊缺。論俸推升。仍加銜留任。其守備員缺。仍照舊於河營千把總內揀選。遞行題補。拔補以上遊擊。應升參將。署都司銜。應升遊擊之守備。守備應升都司。其中果有弓馬優嫻。長於營伍者。該督豫出考語。造冊送部。遇有河標應題之缺。與該員銜品相當者。亦准酌量題補。○十五年覆准。臺灣現任遊擊。如值較俸推升之時。停其推升他省。加銜一等。仍留原任。俟該員臺俸期滿。該督提題報。照例升用。○十

八年議准。內河水師各官。向與陸路通行較俸。遇應升時。有水師員缺。即行升用。若無水師員缺。皆加銜留任。嗣後應聽各該督提酌量題升。均毋庸與陸路較俸升轉。亦不必加銜留任。○三十二年奏准。陝甘二省屯防官員。屆推升之期。除掣得本省之缺。令其補授外。如推升他省。由部查其班滿回營日期。在半年以內者。仍照舊推升。其在半年以外。扣除以升銜留任。遇有各本省應升選缺。坐補。未經坐補之先。仍照升銜論俸推升。保題升用。○三十五年奉

旨。沙文秀著以都司銜仍留守備之任。俟五年後。如果仍前奮勉。准其題補遊擊。嗣後巡捕營員弁。有以親老留任者。俱照此例行。○四十一年

諭。江南蘇州城守營守備。推升貴州銅仁協都司。該員在江年久。實心緝捕。獲賊甚多。該督請以升銜留任。俟有相當缺出。題補。係為地方捕盜起見。姑從所請。嗣後各督撫不得援此例奏留。○四十三年

諭。巴里坤鎮標右營遊擊。推升廣西全州營參將。該員先後辦理屯田。十有餘載。新疆屯務。應資熟手。其事尚屬可行。著照該都統等所請。准其以參將銜仍留

巴里坤鎮標右營遊擊之任。俟有陝甘相當缺出。照例題補。仍留辦屯田事務。不得竟調回內地所得之缺。○四十八年

諭。毓奇奏江淮衛守備李仁。歷俸已滿。懇請留於本任。俟有漕標都司缺出。奏補等語。著照該督所請。以留任之日起。扣足五年。方准升轉。嗣後各省奏留文武各員。俱照此辦理。著為令。○五十八年奏准。四川省駐防西藏臺站員弁。三年期滿。堪膺保送者。照邊俸例升轉。弓馬平常。年力未衰者。調回本任。弓馬不及。年力已衰者。勒休。派往時豫先覈明。

年滿日期報部。屆推升時。除掣得本省之缺。令其補授留駐外。如推升他省。畏其期滿在半年以內者。照舊推升。在半年以外者。將原缺扣除。以升銜留任。遇有本省缺出坐補。如遊擊推升參將。係籍隸本省者。遇有鄰省缺出坐補。期滿後補行引。

見。未經坐補以前。仍照升銜論俸保題升用。○嘉慶十八年

諭。先福奏請留升任守備以資差緝一摺。江西撫州營千總蘇兆熊。前因節次緝獲匪犯。加恩以守備用。茲

既選升廣東南韶連鎮右營守備。即應令其領劄前赴新任。乃先福違例奏請將蘇兆熊留於江西省題補摺內稱近年匪徒斂迹。比戶輯甯實屬緝捕著有成效等語。竟似蘇兆熊一人將江省盜賊緝獲淨盡。任情誇美。不自知其言之失實。況部選將備各有定例。若外省請留之例一開。紛紛援照。殊於銓法有礙。所奏不准行。○道光十一年

諭。陶澍奏請將緝捕得力之守備遊擊仍留原省等語。江南蕪采營陸路守備趙瑾著准其留於江南。遇有都司缺出。先行升補。其現由部選升直隸三屯協都

司之缺著該部另行選補。又蘇松鎮標中營遊擊鮑起豹京口水師右營遊擊孫廷揚俱著准留江蘇省。遇有外海水師參將缺出分別升補。現當整頓准釐之際朕念其因事制宜量為變通。此次姑允所請。嗣後不可動引為例也。○十三年

諭直隸提標署中軍守備事千總田克敬現經部選廣東惠州協左營守備。據該提督奏該弁曾經出師操練得力懇留於直隸補用。向來應升人員不准奏留。茲因畿輔重地整頓營伍姑著照所請。田克敬准即留於直隸。遇有相當守備缺出酌量補用。他省不得

援以為例。○又

諭。蘇成額奏請將推升都司之守備暫留一年一摺。漕標員弁。向有取巧懸缺之弊。前經降旨。衛守備中。遇有催漕出力。奏留漕標升用者。先行開缺。給予升銜。在營候補。不准仍留衛守備本任。茲據該漕督奏稱。江蘇興武衛守備推升直隸玉田營都司任錫五。江淮衛守備推升陝西長武營都司牛斗南。均係辦漕熟手。現屆新漕緊要之時。若全行更換。差委難期得力。請於各衛中揀選明幹備弁數人。責令任錫五等帶同隨漕練習。以期通曉各幫利弊。河道情形。自係

為慎重漕務起見。姑允所請。所有守備任錫五牛斗南。均准其暫留本任一年。以資熟手。將來一年期滿。不准再行保留。嗣後漕標各員。亦不得援以為例。除牛斗南現有經徵地丁錢糧未完之案。應將推升之處扣除外。其任錫五現升都司一缺。著該部另行銓選。○十四年奏准。伊犁巴燕岱營都司張治國。推升福建省汀州鎮標遊擊。准以升銜留任。其汀州鎮標右營遊擊員缺。另行歸入月分推選。○又諭。琦善奏。校閱提標營伍。請將各屬將弁分別降補勒休一摺。直隸山永協山海路都司舒林。技藝未精。人

不出色。該員現准部咨。推升直隸督標右營遊擊。著即扣除。仍回都司本任。其遊擊員缺。著歸部另選。

又奏准。奉

旨。退回原任人員。不准計算前俸。○十八年

諭。鄧廷楨奏請留推升遊擊一摺。廣東和平營都司馬全。現已推升貴州提標右營遊擊。該督等所請留粵補用之處。著不准行。

武職養親。○乾隆元年議准。武職大小各官。除現辦緊要機務。不准告終養外。其餘父母祖父。母年七十以上。家無以次成丁。許回籍終養。或

雖有兄弟而篤疾不能侍奉。與母老雖有兄弟。而同父異母。皆許回籍終養。其父母年至八十以上。雖家有次丁者。亦許回籍終養。各將終養情由。呈報該上司。轉詳督撫提鎮。取親供印結題明終養。儻有假捏規避。將本官革職。出印結官降二級調用。不行詳查轉報之該管上司。罰俸一年。○九年

諭。向來文官原有親老調補近省之例。武職雖與文官不同。其為養親則一。但改歸本省補用。殊多未便。若於附近省分改補。亦屬可行。著該部議奏。欽此。遵

旨議定。武職各官。因親老改補近地者。發往原籍附近
有題缺省分。交與督撫遇缺題補。俟該員應補
之日。該督撫報部。仍俟原授之任有缺。題請調
補。○二十三年題准。衛所守備千總。遇有親老
改補近省者。毋庸撫臣主稿。由漕督查明。如係
繁缺。將近省繁缺內選員。題請對調。如係簡缺。
即將該員送部。遇有近省選缺。不入班次。歸入
月分銓補。如有藉稱親老。希圖改補情弊。照規
避例叅處。○二十八年

諭。向來親老改補近省。赴補時即照例歸部坐補原缺。

得缺後然後引見。嗣後著照病痊赴部之例。帶領引見。酌量分別錄用。又例稱此項人員。一經卓異。即改入升班。免其坐補原缺。同一養親。而得過薦剡。遂為終南捷徑。恐日久漸開夤緣趨避之風。將來此等人員。並著該部於引見時。將緣由附摺聲明。其公當與否。自難逃朕洞鑒。於銓政更為平允。著為例。○二十

九年議准。衛千總呈請終養。由該督撫咨明兵部彙題。○三十八年

諭。親老改補近省。本屬漢員相沿之例。八旗人員。與漢員本不相同。即不為外任。在部在旗。均得當差報效。

若以親老照漢員一體定例。殊未允協。嗣後八旗升
遷官員。如實係親老不能遠離者。得缺後許其呈報
該部帶領引見。候朕酌量。或以旗員。或以部缺改用。
自無不可。俟該員養親事畢。仍照伊原得之缺坐補。
著為令。○四十二年

諭。嗣後旗人終養之例。著停止。其有親老情願回京者。
准其具呈督撫奏明送部引見。文員以部屬用。武員
或用侍衛。或用旗職。候朕酌量降旨。○四十八年奏
准。親老改近人員。養親事畢。方准捐免坐補原

缺。○五十年奉

旨。兵部具奏武職守備以上各官。親年八十以上。及獨子之親年七十以上者。應否呈請終養一摺。文武本無歧視。而職任各有不同。文職以教孝為先。武職以教忠為重。是以古人於武職。當出兵打仗時。雖遇私艱。仍在軍營宣力。原不必與文職官員一體辦理。嗣後應丁憂之副將以上。著照文職一例行。其參遊以下。如有因親老呈請終養者。仍照舊例辦理。其餘親老。不必概令離任回籍。又奏准武職官員。遇有本生父母年老。在籍侍養乏人者。准其回籍終養。若該員父母年雖七十八十以上。精力尚健。並

不呈請終養者亦不必勒令終養。○五十一年
奏准參將以下衛千總以上各官終養服滿病
痊起用引

見奉

旨不必坐補原缺者歸於雙單月計缺選用其奉

旨照例坐補原缺者不推捐免坐補原缺至親老改

近人員養親事畢服滿後以原缺調補者亦不

准捐免坐補原缺。○嘉慶八年奏准外任武職

旗員遇有親老回京養親事畢由各該旗隨時

咨送兵部帶領引

見毋庸年終引

見○十年奏准。旗員武職。遇有親老回京。養親事畢後。奉旨。在原衙門行走者。遇揀選時。仍准其保送外任。○十七年定。衙所繁缺。守備千總內。有因親老呈請。以近省員缺對調者。服滿後。無論原缺曾否續調有人。即與原缺人員互相調補。其簡缺人員。既係開缺另選。養親事畢之日。仍照月選各官之例。俟原缺缺出生補。○道光二年奏准。現任人員因親老呈請改補近省者。將該員發往鄰省。歸於候補班內題補。養親事畢。由該督撫

報部。俟原缺出。照例將該員題請調補。○四年
奏准。嗣後終養事畢及病痊起用人員。遇原缺
裁改。無可坐補。將該員帶領引

見於摺內。聲明請

旨。或留部以原官選用。或發回原省。以原官補用。恭
候

欽定。○二十五年奏准。嗣後漢軍人員。有因親老呈
改回旗當差者。養親事畢。仍令在原處當差。不
得援漢人服滿坐補原缺之例辦理。○三十年
議定。衛所告近人員。續經出繼胞伯叔為嗣。復

以嗣父母年老告近。比照文職之例。不准。仍照例將該員歸班銓選。○咸豐七年議准。衛所人員。有因親老捐免遠省。如遇丁憂服滿。免其再調遠省之缺。○同治六年奏准。旗員奉

旨外用。因親老在部呈請回旗當差。就近養親。比照實缺旗員具呈督撫之例。由部帶領引

見請

旨。○光緒二年奏准。保舉儘先參將。因親老丁單。情願告降。借補遊擊。留於本省就近養親者。自奏留奉

旨之日起。遇有該省遊擊以下缺出。由該督撫照章借補。

病痊起用。康熙十一年題准。提督總兵官。除年老有疾。題請休致外。其年力未衰。因患病回籍調理者。病痊之日。原籍督撫驗看具題。若在原任省分調理者。病痊之日。該省督撫驗看具題。均送部引。

見候。

旨簡用。又題准。副將以下。衛千總以上各官。因病告請休致者。該督撫提鎮委驗。題請休致。若告

病涉虛。本官革職。委驗出結官。降一級調用。具題之督撫提鎮。罰俸一年。提鎮告病。由總督驗看。具題。無總督者。巡撫具題。若告病涉虛。本官降二級調用。代題之督撫。降一級留任。○雍正七年

諭。向來外官告病回籍者。不復再行起用。朕從愛惜人才起見。已降旨定例。於該員告病之時。該督撫若看其居官尚好。即於本內聲明。俟將來病痊之後。赴部引見。仍以原官補用。文職已有此例。文武本屬一體。以後武職告病者。悉照文職之例行。○十一年議准。

副將以下。衛千總以上。除年老有疾告休者。不復起用外。其年力未衰。一時患病。平日居官好。經該督撫提鎮題請解任調理者。於病痊之日。驗看具題送部引。

見仍以原官補用。○又奏准營千總把總患病告請調理。除尋常供職者。不復起用外。其有居官好人材尚可驅使者。該督撫提鎮委驗出結。於文內聲明。准其解任調理。病痊之日。報部補用。儻規避捏飾。本官革職。委驗出結。官降二級調用。不行詳查轉報之該管官。罰俸一年。○乾隆八

年奏准。武職除年老有疾告休者。不復起用外。其有年力未衰。一時患病。平日居官好。該督撫提鎮題請解任者。遊擊以下各官。准其回籍調治。俟病痊之日。即令原籍督撫照例驗看具題。送部引。

見。仍以原官補用。至副將參將。該督撫提鎮於題請解任調理本內。將應否令其回籍之處。聲明請旨。○十八年議准。巡捕南營遊擊。先因推升四川省撫標右營遊擊。以升銜留任。今病痊起用。例應坐補原缺。但旗員若照綠旗官員坐補原缺之

例。發川候補。於旗員體制未協。請將該員發交
巡捕營。仍以遊擊補用。嗣後旗員遇有升任遠
省。以親老留任。仍應坐補原缺者。即照此辦理。
○二十七年議准。武職告假回籍。假期已滿。委
係患病難愈。該督撫驗明具題開缺。如年力未
衰。病痊後照例驗看具題。送部引

見。仍以原缺補用。○四十三年議准。嗣後告病人員。
令該督撫詳慎註考。如於告病時。出具尚堪起
用考語。至病痊起用後。犯有貪酷。並才力不及
者。將從前保題之督撫提鎮及該上司。照保薦

不實例分別議處。○四十四年

諭。綠營漢員病痊起復。定例必須坐補原缺。若將旗員照例辦理。必致待缺需時。於伊等並無益處。嗣後病痊起復人員。俱著該旗帶領引見。候朕臨時降旨錄用。不必令其守候原缺。著為令。○四十九年奏准。嗣後各旗如遇提鎮大員病痊起用者。照副將等官之例。由該旗帶領引

見。○五十年

諭。嗣後回旗病痊武職各員。如有奉旨以旗員用者。俱不必於年終復行帶領引見。○五十一年奏准。來將

以下。衛千總以上各官。終養服滿病痊起用引見奉。

旨不必坐補原缺者。歸於雙單月計缺選用。其奉

旨照例坐補原缺者。不准捐免坐補原缺。至親老改

近人員。養親事畢。服滿後以原缺調補者。亦不

准捐免坐補。○五十六年

諭。向來武職內丁憂回旗之副將人員。於每年冬間照
文員之例帶領引見。嗣後武職病痊起復。在侍衛旗
員上行走。及終養事畢人員。俱著照吏部文官之例。
於每年冬季一併彙齊引見。○嘉慶六年奏准。軍營

奏請休致人員。除因年老力衰休致者。不復起用外。其因一時受傷患病休致者。將來傷病痊愈時。可否准令起用之處。該軍營大臣於原奏先行聲明。如果痊愈尚堪起用。或由原籍。或由原營。令各該督撫就近親加考驗。切實聲明。專摺具奏。如蒙

恩准。再行送部引

見。恭候

欽定。○八年奏准。外任武職旗員。遇有告病回京病痊起用。由各該旗隨時咨送兵部帶領引

見。毋庸年終引

見。○十年奏准。旗員武職。遇有告病回京。病痊起用

後奉

旨在原衙門行走者。遇揀選時。仍准其保送外任。○

道光十三年奏准。嗣後八旗滿洲蒙古人員病
痊起用。奉

旨發往原省坐補原缺者。遇論俸推升時。照綠營漢
員之例。一體接算前俸。○光緒五年奏准。病痊

引

見奉

旨發往原省以原缺補用之員。遇原缺出坐補不入
輪缺計算。